



Comhairle an
Aontais Eorpaigh

An Bhruiséil, 9 Meitheamh 2016
(OR. en)

10007/16

JAI 552
COPEN 195
DROIPEN 109
CYBER 67
JAIEX 61
EJUSTICE 121

TORADH NA nIMEACHTAÍ

ó:	Ardrúnaíocht na Comhairle
An:	9 Meitheamh 2016
chuig:	na toscaireachtaí
Uimh. an doic. roimhe seo:	9579/16 + COR 1
Ábhar:	Conclúidí ó Chomhairle an Aontais Eorpaigh maidir le feabhas a chur ar an gceartas coiriúil sa chibearspás - Conclúidí ón gComhairle (9 Meitheamh 2016)

Gheobhaidh na toscaireachtaí san Iarscríbhinn, na Conclúidí ón gComhairle maidir le feabhas a chur ar an gceartas coiriúil sa chibearspás a ghlac an Chomhairle ag an 3473ú cruinniú a bhí aici ar an 9 Meitheamh 2016.

Conclúidí ó Chomhairle an Aontais Eorpaigh maidir le feabhas a chur ar an gceartas coiriúil sa chibearspás

Tá RÚN DAINGEAN ag an gComhairle tearmann sábháilte sa chibearspás a shéanadh do choirpigh,

TUGANN SÍ DÁ hAIRE go bhfuil méadú ag teacht ar an tionchar a bhíonn ag cibearchoireacht, ag coireacht chibearchumasaithe agus ag gníomhaíocht choiriúil eile a d'fhág lorg digiteach sa chibearspás,

CUIREANN SÍ IN IÚL GO LÁIDIR an tábhacht mhéadaitheach a bhaineann le r-fhianaise in imeachtaí coiriúla a bhaineann le gach cineál coireachta, agus go háirithe leis an sceimhlitheoireacht,

CUIREANN SÍ IN IÚL GO LÁIDIR an tábhacht a bhaineann leis an gcibearspás a chosaint ar mhí-úsáid agus ar ghníomhaíochtaí coiriúla chun leas ár ngeilleagar agus ár sochaithe, agus dá bhrí sin gur gá do na húdaráis fhorfheidhmithe dlí agus do na húdaráis bhreithiúnacha uirlisí éifeachtacha a bheith acu chun gníomhaíochtaí coiriúla a bhaineann leis an gcibearspás a imscrúdú agus na daoine a dhéanann iad a imscrúdú agus a ionchúiseamh,

MEABHRAÍONN SÍ DI gur tosaíocht é faoin gClár Oibre Eorpach maidir leis an tSlándáil an 28 Aibreán 2015 an comhrac i gcoinne na cibearchoireachta, clár oibre a n-áirítear ann tiomantas an Choimisiúin do na constaicí a bhaineann le himscrúduithe ar cibearchoireacht a athbhreithniú, go háirithe maidir leis na rialacha i ndáil le rochtain ar fhianaise agus ar fhaisnéis,

MEABHRAÍONN SÍ DI an plé a rinne na hAirí Dlí agus Cirt ag an gComhairle Ceartais agus Gnóthaí Baile i mí na Nollag 2015¹ ar na dúshláin a bheidh ann amach anseo do cheartas coiriúil éifeachtach sa ré dhigiteach,

MEABHRAÍONN SÍ DI go dtacaíonn na hAirí Dlí agus Cirt le gnéithe nithiúla a fhorbairt le haghaidh cur chuige comhchoiteann an Aontais maidir le dlínse sa chibearspás, tacaíocht a cuireadh in iúl ag cruinniú neamhfhoirmiúil na Comhairle Ceartais agus Gnóthaí Baile ar an 26 Eanáir 2016,

¹ 14369/15

MEABHRAÍONN SÍ DI an ráiteas Comhpháirteach a thug na hAirí Dlí agus Cirt, na hAirí Gnóthaí Baile agus ionadaithe institiúidí an Aontais uathu maidir leis na hionsaithe sceimhlitheoireachta a rinneadh sa Bhruiséil ar an 22 Márta 2016 agus leagann sí béim ar an ngá atá le bealaí a aimsiú, mar ábhar tosaíochta, chun r-fhianaise a dhaingniú agus a fháil níos tapúla agus ar bhealach níos éifeachtaí tríd an gcomhar le tríú tíortha agus le soláthraithe seirbhíse atá gníomhach ar chríoch na hEorpa a neartú, chun go gcuirfeadh feabhas ar chomhlíonadh reachtaíocht an Aontais Eorpaigh agus mBallstát agus ar theagmháil dhíreach le húdaráis fhorfheidhmithe dlí agus chun go ndéanfar bearta nithiúla a shainaithint chun aghaidh a thabhairt ar an ábhar casta seo le linn na Comhairle Ceartais agus Gnóthaí Baile i mí an Mheithimh²,

MEABHRAÍONN SÍ DI an Teachtaireacht a cuireadh chuig Parlaimint na hEorpa, chuig an gComhairle Eorpach agus chuig an gComhairle ar an 20 Aibreán 2016 i dtaca leis an gClár Oibre Eorpach maidir leis an tSlándáil a bhfuil sé d'aidhm leis comhrac i gcoinne na sceimhlitheoireachta agus an bealach a réiteach le go mbeidh Aontas Slándála éifeachtach agus dílis ann ar thug an Coimisiún tiomantas réitigh a mholadh ina leith agus lena dtabharfar aghaidh ar na fadhbanna a bhaineann le fianaise dhigiteach a fháil i ndáil le himscrúduithe coiriúla,

TUGANN SÍ DÁ hAIRE an Tuarascáil³ ón gComhdháil maidir le dlínse sa chibearspás a reáchtáladh ar an 7ú agus ar an 8ú Márta 2016 in Amstardam, ina léirítear an plé a rinneadh ar réitigh a d'fhéadfadh a bheith ann chun feabhas a chur ar imscrúduithe a dhéanamh sa chibearspás, go háirithe maidir leis na nósanna imeachta um chúnamh dlíthiúil frithpháirteach, maidir le comhar leis an earnáil phríobháideach agus maidir le himscrúduithe sa chibearspás i gcásanna nach eol (go fóill) an áit a bhfuil na sonraí nó áit tionscnaimh na gcibear-ionsaithe,

AG TABHAIRT DÁ hAIRE gur ghlac an Coiste um an gComhar Oibríochtúil sa tSlándáil Inmheánach (COSI) tacar moltaí chun feabhas a chur ar an gcomhar oibríochtúil in imscrúduithe coiriúla sa chibearspás⁴,

TUGANN SÍ DÁ hAIRE an 7ú babhta de mheastóireacht frithpháirteach atá tiomanta do chur chun feidhme praiticiúil agus d'oibriú praiticiúil na mbeartas Eorpach maidir leis an gcibearchoireacht a chosc agus a chomhrac mar rannchuidiú suntasach leis na hiarrachtaí chun dlús a chur leis an gcomhrac i gcoinne na cibearchoireachta,

² 7371/16

³ 7323/16

⁴ 8634/2/16 REV 2

TUGANN SÍ DÁ hAIRE na torthaí ar an athbhreithniú a rinneadh ar an gComhaontú maidir le Cúnamh Dlíthiúil Frithpháirteach idir an tAontas Eorpach agus Stáit Aontaithe Mheiriceá⁵,

TUGANN SÍ DÁ hAIRE na Conclúidí ón gComhairle maidir leis an nGréasán Breithiúnach Eorpach um Chibearchoireacht⁶,

MEABHRAÍONN SÍ DI Coinbhinsiún Chomhairle na hEorpa maidir le Cibearchoireacht an 23 Samhain 2001 agus an Prótacal Breise a ghabhann leis a chuireann an tAontas chun cinn mar chreat tagartha domhanda chun cibearchoireacht a chomhrac,

MEABHRAÍONN SÍ DI Treoir 2014/41/AE maidir leis an Ordú Imscrúdaithe Eorpach i gcásanna coireachta, a bhfuil sé mar aidhm léi imscrúduithe trasteorann feadh an Aontais a dhéanamh níos tapúla agus níos éifeachtaí, i.e. ar bhonn aitheantais fhrithpháirtigh, agus meabhraíonn sí di Treoir 2013/40/AE maidir le hionsaithe i gcoinne córais faisnéise, ag iarraidh ar na Ballstáit, inter alia, a áirithiú go mbeidh pointe oibríochtúil náisiúnta teagmhálaithe acu sna líonraí comhair 24/7 atá ann cheana,

AITHNÍONN SÍ cé go bhforáiltear leis na hionstraimí sin do dheiseanna níos leithne d'fhorfheidhmiú an dlí sa chibearspás, gur ann i gcónaí do chonstaicí praiticiúla agus dlíthiúla, agus gur ann dóibh freisin mar gheall ar fhorbairt ghasta na dteicneolaíochtaí, mar shampla i gcásanna nach bhfuiltear ar an eolas go fóill ar áit tionscnaimh na gcibear-ionsaithe nó ar an áit a bhfuil r-fhianaise nó gur luaineach í, nó i gcásanna ina mbíonn bac ar an gcomhar le soláthraithe seirbhíse de bharr rialachán contrártha,

TUGANN SÍ DÁ hAIRE go sáraítear cearta agus saoirsí bunúsacha le coireacht atá cibearchumasaithe agus le cibearchoireacht, agus gur gá cosaint iomlán na gceart agus na saoirsí sin a áirithiú,

AITHNÍONN SÍ gur cheart go mbeadh úsáid na mbeart imscrúdaitheach ag teacht le cosaint na gceart bunúsach agus na saoirsí bunúsacha agus le prionsabail an riachtanais agus na comhréireachta,

TUGANN SÍ DÁ hAIRE gur glacadh ionstraimí an Aontais le haghaidh cosaint sonraí, go háirithe an Treoir Cosanta Sonraí maidir le daoine aonair a chosaint i ndáil le próiseáil sonraí pearsanta ag údaráis inniúla chun cionta coiriúla a chosc, a imscrúdú, a bhrath nó a ionchúiseamh nó chun pionóis choiriúla a fhorchur, agus maidir le saorghluaiseacht sonraí den sórt sin,

⁵ 9291/16

⁶ 10025/16

TUGANN SÍ DÁ hAIRE tuarascálacha 2012 agus 2013 ón nGrúpa Trasteorann de chuid Choiste Coinbhinsiún na Cibearchoireachta, á rá go bhfuil roinnt tíortha i mbun rochtain trasteorann a fháil ar shonraí nach dtagann faoi raon feidhme Choinbhinsiún Bhúdaipeist, gan bunús dlí soiléir a bheith i gceist,

AITHNÍONN SÍ, maidir le himscrúduithe coiriúla, go bhfuil leas dlisteanach ag na Ballstáit an áit a bhfuil an r-fhianaise nó áit tionscnaimh cibearionsaithe, ar a laghad, a chinneadh,

TÁ RÚN DAINGEAN AICI gníomhú d'fhonn an smacht reachta sa chibearspás a chosaint,

DÉANANN COMHAIRLE AN AONTAIS EORPAIGH AN MÉID A LEANAS,

AIHTNÍONN SÍ gur cheart feidhm a bheith ag na treoirlínte seo a leanas maidir leis an obair a dhéanfar amach anseo chun feabhas a chur ar forfheidhmiú an smacht reachta sa chibearspás agus chun r-fhaisnéis a fháil in imeachtaí coiriúla:

- Maidir le réitigh phraiticiúla chun feabhas a chur ar imeachtaí coiriúla a sheoladh go héifeachtach sa chibearspás, ba cheart go n-urramófaí go hiomlán creataí maidir le cosaint sonraí agus cearta bunúsacha;
- Ba cheart breithniú a dhéanamh ar fheabhas a chur ar an gcomhar le soláthraithe seirbhíse nó ar aon réiteach inchomparáide eile lena gceadófaí sonraí a nochtadh go gasta; D'fhéadfaí próisis dhlíthiúla nach mbeadh chomh dian céanna a bheartú maidir le catagóirí sonracha sonraí a fháil, go háirithe sonraí pearsanta an rannpháirtí agus d'fhéadfadh na geallsealbhóirí uile tairbhe a bhaint as sin;
- Maidir le nósanna imeachta um Chúnaimh Dlíthiúil Frithpháirteach (CDF) a bhaineann le sonraí leictreonacha, ba cheart dlús a chur leo agus iad a shruthlíniú; D'fhéadfaí an méid iarrataí ar CDF idir na húdaráis inniúla a laghdú trí fheabhas a chur ar an gcomhar le soláthraithe seirbhíse, nó trí aon réiteach inchomparáide eile;

- Ba cheart úsáid éifeachtúil a bhaint as nósanna imeachta aitheantais fhrithpháirtigh chun a áirithiú go ndaingneofar agus go bhfaighfear r-fhaisnéis go héifeachtach;
- Ba cheart bearta eile a bhreithniú, bunaithe ar athbhreithniú ar nascfhachtóirí chun dlínse⁷ a fhorfheidhmiú sa chibearspás, lena n-áirítear i gcásanna nuair nach eol an áit a bhfuil na sonraí (fós) nó i gcás ina mbeadh an áit sin luaineach.

MEASANN SÍ go bhfuil sé riachtanach dul i gcomhar le tríú tíortha ábhartha agus le páirtithe príobháideacha lena bhféadfaí éifeacht chomhcheangailte beart éagsúil a bheith ann le haghaidh fhorfheidhmiú éifeachtach an dlí sa chibearspás.

MEASANN SÍ gur cheart go mbeadh forbairt chur chuige chomhchoiteann an Aontais maidir le feabhas a chur ar an gceartas coiriúil sa chibearspás mar ábhar tosaíochta. Ba cheart é sin a dhéanamh ar bhealach a bheadh ag teacht leis an obair atá á déanamh ar chreat Choinbhinsiún Bhúdaipeist de chuid Chomhairle na hEorpa.

IS É A CONCLÚID, DÁ BHRÍ SIN, AN MÉID SEO A LEANAS:

1. TÁ COMHAR LE SOLÁTHRAITHE SEIRBHÍSE LE FEABHSÚ.

Chuide sin,

1. Iarrtar ar an gCOIMISIÚN creat comhchoiteann le haghaidh comhair le soláthraithe seirbhíse a fhorbairt chun catagóirí sonracha sonraí a fháil, go háirithe sonraí an rannpháirtí, nuair a cheadaítear sin le reachtaíocht tríú tíortha, nó aon réiteach inchomparáide eile lena gceadófaí sonraí a nochtadh go gasta agus go dleathach⁸. Iarrtar ar an gCoimisiún an méid sin a dhéanamh i gcomhar leis na Ballstáit agus leis na tríú tíortha ábhartha agus i gcomhar leis an earnáil phríobháideach.

⁷ Chun críocha na gconclúidí seo, tagraíonn na téarmaí “ dlínse a fhorfheidhmiú” agus “dlínse forfheidhmithe” d’inniúlacht na n-údarás ábhartha beart imscrúdaitheach a dhéanamh. De bhun na gconclúidí seo, fiosrófar cur chuige comhchoiteann an Aontais d’fhonn feabhas a chur ar imscrúduithe sa chibearspás le haghaidh cásanna sonracha nuair nach leor na creataí atá ann cheana.

⁸ I gcás ina mbaineann iarratas ar shonraí le haistriú sonraí pearsanta ag údarás Ballstáit, ní mór an dlí ábhartha um chosaint sonraí a chomhlíonadh.

2. Le réitigh den chineál sin, ba cheart go leagfaí amach na ceanglais ar thángthas ar chomhaontú comhchoiteann ina leith lena n-áirítear ceanglais maidir le riachtanas agus comhréireacht le haghaidh na n-iarratas a bheidh dírithe chuig soláthraithe seirbhíse lena gcumasófar rochtain dhleachtach ar shonraí a bheidh ar teachtadh acu. Ba cheart go bhféachfar leis le léirmhínte míréireacha, le coinbhleachtaí idir rialacháin atá ann cheana a chosc agus le haghaidh a thabhairt ar shaincheist an neamhnochtachta maidir le hiarrataí ar shonraí. Ní chuirfidh na réitigh a bheartaítear bac ar na socruithe ar an leibhéal náisiúnta.
3. Chun na críche sin, iarrtar ar an gCOIMISIÚN, i gcomhar leis na Ballstáit, an fhéidearthacht a fhiosrú leis na soláthraithe seirbhíse maidir le foirmeacha agus uirlisí ailínithe amhail na cinn sin dá dtagraítear i Roinn II a úsáid chun fiordheimhniú a éascú, chun nósanna imeachta gasta a áirithiú agus chun trédhearcacht agus cuntasacht a mhéadú maidir leis an bpróiseas a bhaineann le r-fhianaise a dhaingniú agus a fháil.

Iarrtar ar AN gCOIMISIÚN tuarascáil mheasúnachta maidir le dul chun cinn ar an tsaincheist sin a chur i láthair faoi mhí na Nollag 2016 agus spriocanna insoláthartha a chur i láthair faoi mhí an Mheithimh 2017.

II. NÍ MÓR NÓSANNA IMEACHTA UM CHÚNAMH DLÍTHIÚIL FRITHPHÁIRTEACH (CDF) (AGUS AITHEANTAIS FRITHPHÁIRTIGH, I gCÁS INARB INFHEIDHME) A SHRUTHLÍNIÚ

Chuige sin,

4. Iarrtar ar an gCOIMISIÚN bealaí a aimsiú, i gcomhar leis na BALLSTÁIT agus, i gcás inar gá, tríú tíortha, mar ábhar tosaíochta, chun r-fhianaise a dhaingniú agus a fháil níos gasta agus níos éifeachtaí trí úsáid na nósanna imeachta um chúnamh frithpháirteach agus úsáid nósanna imeachta aitheantais fhrithpháirtigh, i gcás inarb infheidhme, a shruthlíniú.
5. Chun na críche sin, iarrtar ar an gCOIMISIÚN, i gcomhar leis na BALLSTÁIT, le EUROJUST agus le tríú tíortha, moltaí a bhreithniú agus a dhéanamh maidir leis an gcaoi a ndéanfaí oiriúnú, i gcás inarb iomchuí, ar na foirmeacha caighdeánaithe agus ar na nósanna imeachta atá ann cheana chun iarraidh a dhéanamh ar r-fhianaise a dhaingniú agus a fháil.
6. Chun méadú a dhéanamh ar úsáid éifeachtúil fhoirmeacha agus nósanna imeachta caighdeánaithe den chineál sin chun r-fhianaise a fháil, iarrtar ar an gCoimisiún, i gcomhar leis na Ballstáit, le EUROJUST, le CEPOL agus i gcás inar gá le tríú tíortha, agus úsáid á baint, i gcás inarb iomchuí, as uirlisí leictreonacha atá ann cheana, agus inniúlachtaí agus bealaí cumarsáide faoi na creataí dlí atá ann faoi láthair á n-urramú, forbairt a dhéanamh ar na nithe seo a leanas:
 - tairseach shlán ar líne le haghaidh iarrataí agus freagairtí leictreonacha maidir le r-fhianaise agus na nósanna imeachtaí comhfhreagracha, lena n-áirítear úsáid roghnach d'aistriúchán uathoibríoch ar iarrataí den chineál sin, agus chun iad a rianú agus a lorg chomh maith;
 - treoirlínte agus modúil thiomnaithe oiliúna, i gcomhar leis an nGréasán Eorpach um Oiliúint Bhreithiúnach, leis an nGréasán Breithiúnach Eorpach um Chibearchoireacht agus leis na húdaráis ó thríú tíortha nuair is gá, maidir leis na creataí atá ann faoi láthair a úsáidtear chun r-fhianaise a dhaingniú agus a fháil a úsáid go héifeachtúil, lena n-áirítear treoirlínte chun na dálaí a shoiléiriú, nuair nach gceanglaítear, faoi na rialacha atá ann faoi láthair, CDF nó ionstraimí aitheantais fhrithpháirtigh a úsáid.

Iarrtar ar an gCOIMISIÚN tuarascáil mheántearma maidir leis an dul chun cinn atá déanta ar na gníomhaíochtaí sin a chur ar fáil faoi mhí na Nollag 2016 agus spriocanna insoláthartha a chur i láthair faoi mhí an Mheithimh 2017 ar a dhéanaí. Iarrtar ar an gCOIMISIÚN an tairseach ar líne a chur i láthair faoi mhí na Nollaig 2017.

7. Iarrtar ar an gCOIMISIÚN, i gcomhar leis na BALLSTÁIT agus, i gcás inar gá, le tríú tíortha, céimeanna breise a bhreithniú chun r-fhianaise a dhaingniú agus a fháil níos éifeachtaí, trí úsáid a bhaint as an gcreat CDF AE-SAM i measc nithe eile.
8. Iarrtar ar an gCOIMISIÚN, d'fhonn leas iomlán a bhaint as Treoir 2014/41/AE maidir leis an Ordú Imscrúdaithe Eorpach i gCásanna Coireachta ("an Treoir OIE") chun críche r-fhianaise a dhaingniú agus a fháil san Aontas, leanúint de thacaíocht a thabhairt do na Ballstáit agus d'fhaireachán a dhéanamh orthu i bpróiseas trasuite na Treorach sin faoin 22 Bealtaine 2017.
9. Iarrtar ar na BALLSTÁIT an méid seo a leanas a dhéanamh:
 - an Coinbhinsiún maidir le Cibearchoireacht ón 23 Samhain 2001 a dhaingniú agus a chur chun feidhme go hiomlán;
 - an Treoir OIE a thrasú go pras, faoin 22 Bealtaine 2017 ar a dhéanaí;
 - cumas leordhóthanach a áirithiú chun iarrataí ar CDF a láimhseáil a bhaineann le himscrúduithe sa chibearspás agus oiliúint iomchuí a chur ar fáil don fhoireann maidir le conas déileáil leis na hiarrataí sin;
 - an leas is fearr a bhaint as na pointí teagmhála 24/7 atá ann cheana agus an úsáid a bhaintear as foirne comhpháirteacha imscrúdaithe a mhéadú, d'fhonn comhroinnt faisnéise a éascú agus/nó dlús a chur le himeachtaí CDF.

III. BA CHEART ATHBHREITHNIÚ A DHÉANAMH AR NA RIALACHA MAIDIR LE DLÍNSE FORFHEIDHMITHE SA CHIBEARSPÁS.

Chuide sin,

10. Iarrtar ar an gCoimisiún, i bhfianaise an treoir pholaitiúil ó na hAirí Dlí agus Cirt ag an gComhairle i mí an Mheithimh 2016 agus i gcomhar leis na BALLSTÁIT, le EUROJUST agus le EUROPOL, féachaint ar na deiseanna le haghaidh chur chuige chomhchoiteann an Aontais maidir le dlínse forfheidmithe sa chibearspás i gcásanna nuair nach leor na creataí atá ann cheana, e.g. cásanna ina n-úsáidtear roinnt córas faisnéise go comhuaineach i ndlíní éagsúla chun coir amháin a dhéanamh, cásanna ina ngluaiseann r-fhianaise ábhartha idir na dlíní in achar gearr ama, nó cásanna ina n-úsáidtear modhanna sofaisticiúla chun an áit a bhfuil an r-fhianaise nó an ghníomhaíocht coireachta a cheilt, a mbíonn “cailliúint na háite sin” de thoradh air sin.⁹
11. Agus aird á tabhairt ar shaintréithe gach cáis, ba cheart na nithe seo a leanas a chinneadh leis an gcur chuige:
 - na nascfhachtóirí lena bhféadfadh bonn cirt a sholáthar don dlínse forfheidmithe sa chibearspás;
 - más féidir bearta imscrúdaithe a úsáid beag beann ar theorainneacha fisiciúla, agus sa chás gur féidir cé acu bearta is féidir a úsáid.
12. ní mór aird a thabhairt ar na nithe seo a leanas:
 - cineál agus tromchúis na gcionta a d’fhéadfadh imeacht gan phionós murach é;
 - forais féideartha don dlínse forfheidmithe, i.e. ar bhonn nascfhachtóirí amhail mar shampla suíomh cheanncheathrú soláthraí seirbhíse, gníomhaíocht eacnamaíoch an tsoláthraí seirbhíse i stát an imscrúdaithe, i.e. nuair a thairgeann an soláthraí seirbhíse táirgí nó seirbhísí ar chríoch an stáit imscrúdaithe (“nasc gnó”), áit ghnáthchónaithe agus/nó náisiúntacht an chúisí nó an duine atá faoi amhras, agus/nó an áit a bhfuil an duine lena mbaineann;

⁹ Níl ansin ach samplaí. Iarrtar ar an gCoimisiún scrúdú a dhéanamh ar réitigh lena dtabharfaí aghaidh ar chásanna tromchúiseacha den sórt sin nó ar chásanna lena mbeadh údar ann don chineál sin cur chuige.

- úsáid agus éifeachtacht orduithe táirgeadh intíre bunaithe ar nascfhachtóirí féideartha don dlínse forfheidhmithe sa chibearspás;
- réiteach comhair do rochtain dhíreach thrasteorann ar shonraí gan chúnamh teicniúil;
- cosaintí iomchuí, amhail cearta agus saoirsí bunúsacha, sonraí pearsanta, prionsabal na coimhdeachta agus na comhréireachta a chosaint mar threoirphrionsabal le haghaidh bearta imscrúdaitheacha chun a ndleathacht a ráthú;
- cosúlachtaí le córais dlí trasteorann eile, e.g. an Conradh um Aerspás Oscailte agus an Coinbhinsiún maidir le Dlí na Farraige, rialacha an Aontais maidir le Cosaint Sonraí agus Dlí Iomaíochta an Aontais;
- an éifeacht a bheadh ag cur chuige den chineál sin ar an gcreat dlíthiúil atá ann faoi láthair.

Iarrtar AR AN GCOIMISIÚN tuairisciú maidir leis an dul chun cinn ar fhorbairt an chur chuige seo faoi mhí na Nollag 2016 agus torthaí an mheasúnaithe sin a chur i láthair faoi Mheitheamh 2017. Ba cheart gnéithe sonracha a bheith sa mheasúnú le haghaidh cur chuige chomhchoiteann an Aontais agus tograí chun é a bhaint amach, lena n-áirítear an fhéidearthacht go saothrófaí tionscnamh reachtach i ndáil leis sin.
